

## DAVIES, JAMES ('Iago ap Dewi ' ; 1800-1869), argraffydd a bardd

**Enw:** James Davies  
**Ffugenw:** Iago ap Dewi  
**Dyddiad geni:** 1800  
**Dyddiad marw:** 1869  
**Plentyn:** David Davies  
**Rhyw:** Gwryw  
**Galwedigaeth:** argraffydd a bardd  
**Maes gweithgaredd:** Eisteddfod; Barddoniaeth; Argraffu a Chyhoeddi  
**Awdur:** Watkin William Price

Ganwyd gerllaw Pencader, Sir Gaerfyrddin. Ni chafodd ddim manteision addysgol pan yn ieuanc, a bu'n gweithio ar ffermydd. Ymunodd ag eglwys yr Annibynwyr ym Mhencader. Pan oedd tuag 20 mlwydd oed peidiodd â gweithio ar ffermydd ac aeth i Gaerfyrddin yn brentis argraffydd gyda [John Evans](#), argraffydd, swyddfa *Seren Gomer*. Yno cyfarfu â rhai o anianawd gyffelyb i'r eiddo ei hun - e.e. [W. E. Jones](#) ('Gwilym Cawrdaf') a [William Thomas](#) ('Gwilym Mai'). Trwy gymorth ei gilydd buont yn meistrolï cynganedd a'r mesurau rhyddion. Tua'r flwyddyn 1840 ymadawodd Davies â Chaerfyrddin i fynd i weithio yn swyddfa [Josiah Thomas Jones](#) yn y Bont-faen, lle yr oedd yn argraffu *Y Gwron*. Glynodd wrth [J. T. Jones](#) gan symud gydag ef i Gaerfyrddin yn 1842 ac i Aberdar yn 1854.

Cystadleuai 'Iago ap Dewi' yn fynych ar destunau barddoniaeth mewn eisteddfodau lleol ond heb ennill y wobr gyntaf byth bron; daeth yn ail yn eisteddfod Cymreigyddion Caerfyrddin gyda'i awdl ar 'Caethiwed'. Cyhoeddwyd lluo o'i ganeuon mewn cyfnodolion - *Seren Gomer*, *Yr Efanglydd*, *Y Drysorfa Gynulleidfaol*, *Y Gwron*, etc. Canodd 'Llinellau ar y Gwlaw Dymunol a Gafwyd ar ol Hir Sychder, Gorffennaf 6, 7, 8, 1826,' a chyhoeddwyd hwynt yn *Seren Gomer*, Awst 1826 (ac eilwaith yn 1844). Cyhoeddodd ei waith yn 1858 o dan y teitl - *Myfyrdodau Barddonol...* Ceir emyn o'i waith yn *Y Caniedydd Cynulleidfaol*, 1895. Gweithiodd dros yr achos dirwestol pan oedd yn byw yn Aberdâr. Bu farw 16 Ebrill 1869.

Rhoes ei fab DAVID DAVIES ('Dewi ab Iago'), a fu farw 1913, gymorth mawr i [Rhys Evans](#) ac i gerddoriaeth grefyddol yng nghapel Siloa, Aberdâr.

### Awdur

Watkin William Price, (1873 - 1967)

### Ffynonellau

Josiah Thomas Jones, [Geiriadur Bywgraffyddol o Enwogion Cymru \(Aberdâr 1867-70\)](#), ii, 662

Ben Morus, *Enwogion Aberdâr* (1910), 1910

D. Silyn Evans, *Bywgraffiad y Diweddar Barch. David Price, Siloa, Aberdâr* (Aberdâr 1896), 1896

*Catalogue of Printed Literature in the Welsh Department, Cardiff Free Libraries* (1898)

### Dolenni Ychwanegol

Wikidata: [Q20733311](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.